



UKA 2016/78
3 okt. 2016
Ane Hansen

Inatsisartunut aalajangiiffigisassatut siunnersuutigineqarpoq Naalakkersuisut peqquneqassasut Inatsisartut peqqussutata nr. 12, 19. November 2007-imeersup Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu, aalajangersakkat aallangortinneqassasut ilaqutariit ataatsit illui tuniniaanermi akigitinneqartut kisiisa atorlgit tiguneqarsinnaalerillugit.

(Inatsisartunut ilaasortaq Steen Lynges, Atassut)

Ineqarneq toqqissillunilu angerlarsimaffeqarsinnaaneq inuunermi pingaaruteqaqaaq. Inuit Ataqatigiit tungaviummik kikkut tamarmik toqqissinartumik inissaqartinneqarnissaat pingartitaraat.

Inatsisartuni ilaasortaq Steen Lynges Atassut siunnersuutigaa Namminersorlutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu aalajangersakkat allangorteqqullugit ilaqutariit ataatsit illui tuniniaanermi akigitinneqartut kisiisa atorlgit tiguneqarsinnaalersillugit.

Inatsisartunut ilaasortaq Steen Lynges siunnersuutaa soqutiginarpoq, peqqussummi taanna piffissap ilaanni arlaleriarluni allangortinneqartarsimavoq ilaatigullu soqutigisarsorluni pitsaavallaangitsumik atorneqarnera annertuumik Politikkerit atorfillillu akornanni pasilliutaasimalluni, ullumikkumullumi allaat sulii taamatut misigineqartarsimasoq siunnersuuteqartup ersersippaa, tungavilersuutimini taasaqarami kammalaasersorluni aki atorlugu tunisisoqartarsinnaasoq ersersillugu. Siunnersuuteqartup tungavilersuutai misissorluassallugit qulaajaavigissallugillu soqutiginarorujussuupput. Siunnersuuteqartummi siunnersuummini tungavilersuutai ilumortortaqaarsimassappata tassa kammalaasersorluni aki atorlugu sulii tunisisoqartarsimasoq tamanna akuersarneqarsinnaangilaq misissorneqartariarlunilu iluarsiiviginiarlugu.

Naalakkersuisoqarfimmiit akissuteqaat aamma misissugassaqqippoq oqarmata taamatut aaqqiisoqassappat illoqarfiit minnerusut nunaqarfiillu kingunerlussasoq. Illoqarfinni anginerusuni illoqarfinnilu mikinerusuni akit assigiingittorujussorerput nunaqarfinni aamma taamaapput.

Naalakkersuisoqarfimmi ineqarnermut tungasut misissugassagut qulaajagassagullu amerlaqaat, uparuartorneqartorujussuuvugut ineqarnermi sullissineq pillugu, minnerungitsumillu pisortat inissiaataani sullissineq pillugu. INI A/S aqutigalugu inissianik attartortut atukkatik naammagittaalliutigisorujussuuvaaq inigisanut akiliutigineqartartunut qaffakkaluttuinnartunut aserfallattaaliineq malinnaangilaq iluarsisassaqaqpassuaqarlunilu innuttaasunik annetuumik uparuarneqaatigisarpagut iluarsisariaqarlunnakkagut.

Inissianut inigisanullu pisortat pigisaanut tungatillugu kammalaalersornermut tungasunik uparuarneqarpallaapugut sorlu aamma maanna oqaluuserisatsinnik siunnersuuteqartup tamanna tungavilersuummi ilaanni taagaa, kammalaasersorneq akigititanut ilangullugu allaat taaneqarluni. Aasap ingerlanerani Nuuk TV-kut sammineqarpoq inissianik iluarsaartuussinissami allaffeqarfik suliarinnittussarsinneqangitsumik Danskit suliffeqarfiutaasa ilaannut LH siunnersortinut tunniunneqarsimasoq suliassaq 7 mio.-kr.-nik

nalilik. Tassani oqariartuutit maluginiagassat qaangiataaginnarneqarsinnaangittullu ilagaat suliammut suliarinnittussarsiuussingittornermi kammalaatersornermik pasilliineq.

Pisortaqarfinni pisortat pigisaanni sulineq kammalaatersornermik pasilliiffiussangilaq, pasiliutit tamakkua imaannangitsumik suliaaqqartippaatigut – pisortat sullivii kammalaatersornermik pasilliiffiussangillat, innuttaasut tusagassiorfiillu tungavilersorlutik pasilliutaat ilumortortaqarnermut qulaajaavigineqartariaqarput.

Taamatut oqaaseqarluta Inatsisartuni ilaasortap Steen Lyngep siunnersuutaa Inatsisartut sanartornermut ataatsimiisilaliani qulaajaavigineqassasoq kissaatigarput ilumut ullumikkut suli kammalaatersorluni akinut allaat pasilliutigineqarsinnaasunik ingerlatsisoqarnermut qulaajarlugu.